

SS. Sacramento; deinde surgens, sinistra Patenam, dextera vero Hostiam reverenter accipit, quam aliquantulum elevatam tenet super Patenam, et conversus ad Ordinatam in medio altaris, dicit:
 Ecce Agnus Dei, ecce qui tollit peccata mundi.

Mox ter subjungit:
 Dómine, non sum dignus, ut intres sub tectum meum: sed tantum dic verbo, et sanábitur ánima mea.

Et accedens, Ordinato porrigit SS. Sacramentum, faciens cum eo signum crucis super Patenam, et simul dicens:

Corpus ✠ Dómini nostri Jesu Christi custódiat te in vitam aetérnam. Et Ordinatus respondens Amen. manum Pontificis Hostiam tenentem osculatur, et communionem reverenter sumit, ori ejus supposita Patena. Deinde unus ministrorum purificat illum Calice, aut alio vase cum vino ad hoc destinato; et cum Ordinatus os ad mappulam exterserit, redit ad locum suum.

Hæc omnia simili modo servabuntur in Ordinatione Diaconi, si ipse solus fuerit ordinatus.

Communionem peracta, Pontifex colligit fragmenta cum Patena, quam super Calicem suum extergit, et purificationem sumit, cum digitorum ablutione; quo facto, mitram accipit, et lavat manus, quibus extersis, statim deposita mitra, stans in cornu Epistolæ, Missam prosequitur, Postcommunionem diei Ordinati Postcommunionem adjuneta; sub uno Per Dóminum, nec omittit alias, si quæ faciendæ sint, Commemorationes.

Data Benedictione, ut moris est, et reddito baculo Pastoralis, sedet Pontifex in faldistorio ante medium altaris posito: mox Ordinatus accedit, qui, facta profunda Pontifici reverentia, genuflectit; tum his verbis Subdiaconum aut Diaconum alloquitur Pontifex, dicens:

FILI dilectissime, diligenter considera Ordinem per te susceptum, ac onus húmeris tuis impósitum: stude

sancte et religiósè vivere, atque omnipoténti Deo placere, ut grátiam suam possis acquirere, quam ipse tibi per misericórdiam suam concedere dignétur. Ad Subdiaconátum (vel ad Diaconátum) ordináte, dic Noctúrnium talis diei; et omnipoténtem Deum étiam pro me ora.

Quod ille reverenter suscipit, ac promittit se facturum. Attamen, si pluribus unicuique diversus Ordo delatus fuerit, admonet eos simul, ut habetur infra, expleta Ordinatione Presbyteri.

Tum surgit Pontifex, et amoto faldistorio, convertit se ad cornu Evangelii, ubi, deposita mitra, dicit: Dóminus vobiscum. Deinde, Inítium sancti Evangelii secundum Joánnem. In principio erat Verbum; et signat tabellam in qua est Evangelium; aut (si deficiat) signat altare et se. Mox acceptis mitra et baculo, prosequitur, factaque Cruci debita reverentia in infimo gradu altaris, revertitur ad sedem suam, vel ad faldistorium, ubi exiit sacris vestibus. Si vero aliud Evangelium sit dicendum, illud in cornu Evangelii totum legit, eoque dicto, recedit ut prius.

DE ORDINATIONE DIACONI.

Pro Diacono paretur liber Evangeliorum; Hostia parva, ac velum album pro Communionem.

PONTIFEX omnibus paraméntis pontificalibus, coloris tempore et officio convenientis, ad Missam necessario celebrandam indutus, ut Ordinationem Diaconatus conferat, in Dominicis, aut festivis diebus ex dispensatione apostolica, aut statutis a jure temporibus, dicta Oratione diei cum sequenti collecta pro Ordinando:

EXAUDI, quæsumus Dóminè, súpplícum preces, et devóto tibi pectore famulantes perpétua defensione custódi : ut nullis perturbatióibus impediti, liberam servitútem tuis semper exhibeamus officiis. Per Dóminum nostrum Jesum Christum Filium tuum : qui tecum vivit et regnat in unitate Spíritus sancti Deus, per ómnia sæcula sæculórum. *ñ.* Amen.

Quæ semper dicitur sub uno Per Dóminum, etc. et factis aliis Commemorationibus, si quæ sint faciendæ, legit Epistolam : qua finita, accedens ad faldistorium ante medium altaris paratum, sedet cum mitra.

Et, si hujusmodi Ordinis collatio fiat extra Tempora, legitur primo loco Mandatum apostolicum, ut dictum est supra pag. 249.

Interim promovendus ad Ordinem Diaconatus per Archidiaconum, aut illius locum tenentem, vocatur, dicendo :

Accédat qui ordinándus est ad Diaconátum.

Mox Ordinandus indutus jam amictu, alba, cingulo, et manipulo, ac stolam in sinistra manu, dalmaticam vero coloris albi supra brachium sinistrum, et candelam in dextera tenens, per Notarium nominatus accedit, et, facta Pontifici profunda reverentia, genuflectit.

Tum Archidiaconus illum offerens Pontifici, sub his verbis loquitur, dicens :
Reverendissime Pater, póstulat sancta mater Ecclesia Cathólica, ut hunc præsentem Subdiáconum ad onus Diacónii ordinétis.

Pontifex interrogat, dicens :
Seis illum dignum esse?

Respondet Archidiaconus :
Quantum humana fragilitas nosse sinit, et scio, et testificor ipsum dignum esse ad hujus onus officii.

Mox Pontifex respondet :
Deo grátias.

Et ad ejus Ordinationem procedit. In primis Pontifex sedens cum mitra, Clero populoque annuntiat, dicens :

Auxiliante Dómino Deo, et Salvatore nostro Jesu Christo, eligimus hunc præsentem Subdiáconum in Ordinem Diacónii. Si quis habet áliquid contra illum, pro Deo, et propter Deum cum fidúcia éxeat, et dicat : verúm-tamen memor sit conditionis suæ.

Et facta aliquali morula, Pontifex convertit Orationem suam ad Ordinandum, quem sic admonet :

PROVEHENDUS, fili dilectissime, ad Leviticum Ordinem, cógita magnópere ad quantum gradum Ecclesiæ ascéndis. Diáconum enim opórtet ministrare ad altáre, baptizáre, et prædicáre. Sane in véteri lege, ex duódecim, una tribus Levi elécta est, quæ speciáli devotióne tabernáculo Dei, ejúsque sacrificiis, ritu perpétuo deserviret. Tántaque dignitas illi concessa est, quod nullus, nisi ex ejus stirpe, ad divinum illum cultum atque officium ministráturus assúrgeret; ádeo ut grandi quodam privilegio hæreditátis et Tribus Dómini esse mererétur et dici : quorum hódie, fili dilectissime, et nomen et officium tenes, quia in ministérium tabernáculi testimónii, id est, Ecclesiæ Dei, eligeris in Levítico officio, quæ semper in procinctu pósta, incessábili pugna contra inimicos dimicat : unde ait Apóstolus : Non est nobis colluctatio advérsus carnem et sánguinem, sed advérsus príncipes et potestates, advérsus mundi rectóres tenebrárum harum, contra spirituália nequitiæ, in coeléstibus. Quam Ecclesiam Dei, véluti tabernáculum, portáre et munire debes ornátu sancto, prædicátu divino, exémplo perfécto. Levi quippe interpretátur ádditus, sive assúptus. Et tu, fili dilectissime, qui ab hæreditate patérna nomen áccipis, esto assúptus a carnálibus desidériis, a terrénis concupiscéntiis, quæ militánt advérsus ánimam. Esto nítidus, mundus,

purus, castus, sicut decet ministrum Christi, et dispensatorem mysteriorum Dei: ut digne addaris ad numerum Ecclesiastici gradus: ut hereditas et tribus amabilis Domini esse merearis. Et quia comminister et cooperator es Corporis et Sanguinis Domini, esto ab omni illecebra carnis alienus; sicut ait Scriptura: Mundamini qui fertis vasa Domini. Cogita beatum Stephanum, merito precipuae castitatis ab Apostolis ad officium istud electum. Cura, ut quibus Evangelium ore annuntias, vivis operibus exponas; ut de te dicatur: Beati pedes evangelizantis pacem, evangelizantis bona. Habe pedes tuos calcetos Sanctorum exemplis, in preparatione Evangelii pacis: quod tibi Dominus concedat per gratiam suam. *R.* Amen.

Deinde, si non sit ordinatus Subdiaconus, ordinandus Diaconus se prosternit ad cornu Epistolae, vel ubi genuflectebat.

Presbyterandus vero, si adsit, vocatus, ut supra pag. 250. in Ordinatione Subdiaconi dictum est, procumbit ad ejus dexteram super tapete. Pontifex autem cum mitra ante faldistorium suum genuflectens supra pulvinum, recitat Litanias, pag. 15. vel schola cantat eas, si officium fiat in cantu, et suo loco, Ordinandus per Pontificem benedicetur, ut pag. 250. habetur.

Postea Ordinando ab accubitu surgente, genuflexo tamen manente, Presbyterandus admonitus redit ad locum suum, et Pontifex sedens in faldistorio cum mitra, intelligibili voce alloquitur clerum et populum dicens:

COMMUNE votum communis Oratio prosequatur: ut hic totius Ecclesiae prece, qui ad Diaconatus ministerium preparatur, Leviticae bene *✠* dictionis ordine clarescat; et spirituáli conversatione praefulgens, gratia sanctificationis eluceat. Praestante Domino nostro Jesu Christo, qui cum Patre et Spiritu sancto vivit et regnat Deus in saecula saeculorum. *R.* Amen.

Deinde surgens cum mitra Pontifex, stans versus ad Ordinandum, dicit alta voce legendo:

OREMUS, fratres charissimi, Deum Patrem omnipotentem, ut super hunc famulum suum, quem ad officium Diaconatus dignatur assumere, benedictionis suae gratiam clementer effundat; eique consecrationis indulgentiae propitius dona conservet, et preces nostras clementer exaudiat: ut quae nostro gerenda sunt ministerio, suo benignus prosequatur auxilio; et quem sacris mysteriis exequendis pro nostra intelligentia credimus offerendum, sua bene *✠* dictione sanctificet et confirmet. Per unigenitum Filium suum Dominum nostrum Jesum Christum, qui cum eo et Spiritu sancto vivit et regnat Deus,

Deinde, deposita mitra, et extensis ante pectus manibus, dicit in tono Praefationis, si officium fiat in cantu:

Per omnia saecula saeculorum. *R.* Amen.

- V.* Dominus vobiscum.
- R.* Et cum spiritu tuo.
- V.* Sursum corda.
- R.* Habemus ad Dominum.
- V.* Gratias agamus Domino Deo nostro.
- R.* Dignum et justum est.

Vere dignum et justum est, æquum et salutare, nos tibi semper, et ubique gratias agere: Domine sancte, Pater omnipotens, æternæ Deus, honorum dator, ordinumque distributor, atque officiorum dispensor, qui in te manens innovas omnia, et cuncta disponis per verbum, virtutem, sapientiamque tuam, Jesum Christum Filium tuum Dominum nostrum, sempiterna providentia preparas, et singulis quibusque temporibus aptanda dispensas. Cujus corpus, Ecclesiam videlicet tuam, caelestium gratiarum varietate distinctum, suorumque conexum distinctione membrorum, per legem mirabilem

totius compáginis unitum, in augméntum templi tui créscere dilatarique largiris, sacri múnere servitútem trinis grádibus ministrórum nómini tuo militáre constituens, eléctis ab initio Levi filiis, qui in mysticis operationibus domus tuæ fidélibus excúbiis permanéntes, hæreditátem benedictiónis æternæ sorte perpétua possidérent. Super hunc quoque fámulum tuum, quæsumus Dómine, placátus inténde, quem tuis sacris altáribus servitúrum in officium Diaconátus suppliciter dedicámus. Et nos quidem tamquam hómines, divini sensus et summæ ratiónis ignári, hujus vitam, quantum póssumus, æstimámus. Te autem, Dómine, quæ nobis sunt ignóta non tránseunt, te occúlta non fallunt. Tu cógnitor es secretórum; tu scrutátor es córdium. Tu istius vitam cœlesti póteris examináre iudício, quo semper prævalet, et admissa purgáre, et ea quæ sunt agénda concédere.

Hic solus Pontifex extensam manum dexteram ponit super caput Ordinandi, dicens :

Accipe Spíritum sanctum, ad robur, et ad resisténdum diabolo, et tentatióibus ejus : in nómine Dómini.

Deinde prosequitur, ut prius, extensam tenens manum dexteram versus Ordinandum usque in finem Præfationis :

EMITTE in eum, quæsumus Dómine, Spíritum sanctum, quo in opus ministérii tui fidéliter exequéndo septiformis grátia tuæ múnere roborétur. Abúndet in eo totius forma virtútis, auctóritas modésta, pudor constans, innocéntiæ puritas, et spirituális observántia disciplinæ. In móribus ejus præcépta tua fúlgeant, ut suæ castitátis exémplo imitationem sanctam plebs acquirat; et bonum consciéntiæ testimónium præferens, in Christo firmus et stábilis perseveret; dignisque succéssibus de inferióri gradu per grátiam tuam cápere potióra mereátur.

Quod sequitur dicit submissa voce legendo, ita tamen quod a circumstantibus possit audiri :

Per eúmdem Dóminum nostrum Jesum Christum Filium tuum, qui tecum vivit et regnat in unitáte ejúsdem Spíritus sancti Deus, per ómnia sæcula sæculórum. *R.* Amen.

Post hæc Pontifex sedens cum mitra, Ordinando ante se genuflexo porrigit osculandam Crucem, in medio stolæ positam, ac ipsam stolam imponit super humerum ejus sinistrum, dicens :

Accipe stolam ✠ cándidam de manu Dei : adimple ministérium tuum; potens enim est Deus, ut áugeat tibi grátiam suam : qui vivit et regnat in sæcula sæculórum. *R.* Amen.

Faciens super Ordinandum signum crucis, aliquis vero minister reflectet capita stolæ, et alligabit sub brachio ejus dextero.

Deinde Pontifex accipiens Dalmaticam ea totaliter induit Ordinandum, dicens :

Induat te Dóminus induménto salutis et vestiménto lætitiæ, et Dalmática justitiæ circúmdet te semper. In nómine Dómini. *R.* Amen.

Postremo Pontifex accipit, et Ordinando tradit librum Evangeliorum, quem manu dextera tangenti dicit :

Accipe potestátem legéndo Evangélium in Ecclésia Dei, tam pro vivis, quam pro defúnctis : In nómine Dómini. *R.* Amen.

Quo facto, Pontifex, stans sine mitra ad altare conversus, dicit : Orémus.

Ministri subjungunt : Flectámus gènua. R. Leváte.

Deinde vertens se ad Ordinatum, dicit :

EXAUDI, Dómine, preces nostras et super hunc fámulum tuum Spíritum tuæ bene ✠ dictionis emitte : ut cœlesti múnere ditátus et tuæ majestátis grátiam possit acquirere, et bene vivéndo áliis exémpulum præbere. Per Dóminum nostrum Jesum Christum Filium tuum, qui tecum vivit et regnat in unitáte ejúsdem Spíritus sancti Deus, per ómnia sæcula sæculórum. *R.* Amen.

OREMUS.

DOMINE sancte, Pater Fidei, Spei, et Gratiæ, et profectuum remunerator, qui in cœlestibus et terrënis Angelorum ministeriis ubique dispositis per omnia elementa voluntatis tuæ diffundis effectum : hunc quoque famulum tuum spirituáli dignare illustrare affectu ; ut tuis obséquiiis expeditus, sanctis altaribus tuis minister purus accrescat, et indulgentia tuâ purior, eorum gradu, quos Apóstoli tui in septenarium numerum, beato Stéphano duce ac prævio, Spiritu sancto auctore, elegerunt, dignus existat ; et virtutibus univërsis, quibus tibi servire oportet, instructus, tibi compláceat. Per Dóminum nostrum Jesum Christum Fílium tuum, qui tecum vivit et regnat in unitate ejúsdem Spiritus sancti Deus, per omnia sæcula sæculórum. *℣.* Amen.

His peractis, Archidiacono suggerente, Diaconus surgit, factaque Pontifici profunda reverentia, redit ad locum suum, ibique genuflectit ; et suo loco, si officium fieret in cantu, concinet Evángelium.

Pontifex item surgit, et si Missa legatur, vadit ad cornu Epistolæ, ubi, deposita mitra, illam prosequitur ; si vero cantetur, redit ad sedem, seu faldistorium : et suo loco, et tempore, si adsit, ordinat Presbyterum.

Diaconus autem tam in offerendo candelam, quam in recipiendo Pacem et Communionem, gerit se ut dictum est supra pag. 254. Excepto tamen, quod, si simul ad fuerit alius Ordinatus in Subdiaconum, Diaconus debet semper, et in omnibus actibus illum præcedere, et cantare etiam debet Confiteor, ante Communionem, quando Missa fiat in cantu.

Data benedictione, Episcopus admonet Ordinatam in Diaconum, ut supra pag. 256. et si fuerint plures, sed diversi, ut infra post ordinationem Presbyteri.

DE ORDINATIONE PRESBYTERI.

Pro Presbytero ordinando paretur oleum Catechumenorum ; calix cum vino, et aqua ; patena, et hostia desuper posita ; medulla panis, et bacile cum buccali, et manutergiis pro manibus abluendis tam pro Episcopo, quam pro Ordinando ; stolæ saltem tres coloris convenientis pro impositione manuum super caput Promovendi a tribus saltem Presbyteris facienda ; gremiale lineum album : Hostia parva, et velum pro communionem.

PONTIFEX omnibus paramentis Pontificalibus, coloris tempori, et officio convenientis pro Missa necessario celebranda, indutus, ut Ordinem Presbyteratus conferat : In Missis de Quatuor Temporibus ; et ex Indulto summi Pontificis, in Dominicis ac Festivis diebus a Dominica Septuagesimæ usque ad Pascha exclusivè, ante ultimum Versum Tractus : in Sabbato vero infra Octavam Pentecostes, et in Festis quæ habent Sequentiam, ante ultimum Sequentiæ Versum : in Dominicis autem, et Festivis diebus per annum, et per Adventum ante Versum Allelúia, accipit mitram, et accedens ad faldistorium ante medium altaris sibi paratum, sedet.

Et si fuerit extra Tempora, ante omnia legitur Mandatum Apostolicum, ut dictum est supra pag. 249.

Interim ad Ordinem Presbyteratus promovendum more Diaconorum paratum, amictu, alba, cingulo, stola, et manipulo, habentem planetam coloris albi complicatam super brachium sinistrum, et in manu dextera candelam, ac mappulam albam pro ligandis et tergendis manibus, Archidiaconus, aut illius locum tenens, vocat illum, dicens :

Accédât qui ordinandus est ad Ordinem Presbyteratus.